

ORDINAZIONS DE O CONSELLO D'A FABLA ARAGONESA

[As ordinazions que teneba o Consello d'a Fabla Aragonesa dende o suyo reconoximiento legal en 1978 —a fundación databa de 1976— yeran estatas acotraziatas solamén en aspektos parzials, á o largo de as añadas. Istars que agora se presentan suposan una redazió nueba de raso. Se tratoron en l'Asamblea Cheneral Estraordinaria de o 29 de nobiembre de 1997; se tornoron á tratar en l'Asamblea Estraordinaria de o 30 de mayo de 1998; e á ra fin s'apreboron en l'Asamblea Cheneral Estraordinaria de o 12 d'abiento de 1998. A suya emologazió por o Gubierno d'Aragón, en bersión bilingüe aragonés / castellano, e a suya inscrizió en o Rechistro Cheneral d'Asoziacions, se produzió con calendata de 23 de febrero de 1999.]

CABO I D'O CONSELLO D'A FABLA ARAGONESA

Articlo 1ero. Se constituye l'asociación cultural clamata CONSELLO D'A FABLA ARAGONESA, con siede en a Plazeta d'os Condes de Guara, lumero 3, de Uesca (Palazio Villahermosa), tenendo a facultá d'ubrir os locals que considere oportunos, ta o millor desembolique d'as suyas fins.

Articlo 2ndo. As fins de l'asociación Cultural CONSELLO D'A FABLA ARAGONESA son a esfensa, promozió, estudio e esparidura de l'aragonés en toz os suyos aspektos: istoria, literatura, gramatica, lesico, toponimia, folclore, considerazió sozial e legal, pedagogía, didautica, amostranza, ezetra. Se parará espezial cuenta d'o estudio, proteuzió e desembolique de todas as suyas barrians locals e comarcals, as cuals son l'alazet de l'aragonés común u estándar.

Articlo 3ero. L'ambito territorial d'o CONSELLO D'A FABLA ARAGONESA ye Aragón.

Articlo 4eno. O CONSELLO D'A FABLA ARAGONESA podrá tener estructuras dependiens en traza de roldes locals d'ambito menor. Igualmén podrá tener estructuras dependiens e fer autibidaz difuera d'Aragón. Tamién podrá aber-bi un Rolde de consellers e conselleras d'Aduya.

Articlo 5eno. O quefer d'o CONSELLO D'A FABLA ARAGONESA s'alazeta en istos prenzipios:

- 1ero. Autitú respetuosa enta ra reyalidá trilingüe d'Aragón;
- 2ndo. No ascrizió coleutiba á dengún ligallo pulitico, sindical u relixioso;
- 3ero. Libertá ideyoloxica indibidual de as presonas que lo forman.

Articlo 6eno. Denguna presona miembro d'o CONSELLO D'A FABLA ARAGONESA emplegará l'asociación ta finalidaz puliticas, sindicals u relixiosas de caráuter partidista.

CABO II D'OS ORGANOS DE GUBIerno E AS SUYAS ATRIBUZIONI

Articlo 7eno. Os organos de gubierno d'o CONSELLO D'A FABLA ARAGONESA son l'Asamblea Cheneral de consellers e conselleras e a Chunta Direutiba.

Articlo 8eno. L'Asamblea Cheneral podrá estar ordinaria u estraordinaria.

Articlo 9eno. L'Asamblea Cheneral ordinaria s'achuntará, por o menos, una begata cada añada, clamata por comunicazió escrita d'o Secretaire Cheneral, con una antelazió menima de quinze días, e cuaternando-bi l'orden d'o día e a cantidá de consellers e conselleras que forman quórum.

Artículo 10eno. As funzions de l'Asamblea Cheneral ordinaria serán:

1ero. Fer balance d'a situación de cuentas, podendo-se acordar que iste balance se pueda presentar tamién en una Asamblea Cheneral extraordinaria;

2ndo. Discusión e aprebación d'as autibidaz e os presupuestos de l'asoziazión ta l'añada siguién;

3ero. Fer balance d'a chestión d'a Chunta Direutiba e d'as autibidaz desembolicatas por o CONSELLO D'A FABLA ARAGONESA en a zaguera añada, asinas como marcar as linias d'autoziazión ta l'añada siguién;

4eno. Aprebar u refusar a dentrada de nuevos miembros de Pleno Dreito.

Artículo 11eno. O quórum ta ra zelebrazión de l'Asamblea Cheneral ordinaria será de a metá más uno de as presonas miembros de Pleno Dreito, en primer clamamiento. O segundo clamamiento se ferá de bez que o primero, dixando entre os dos, por o menos, meya ora d'interbalo de tiempo, sin que bi aiga un lumero menimo ta formar quórum en o segundo clamamiento.

Os alcuerdos de l'Asamblea Cheneral ordinaria s'adotarán por mayoría simpla de as presonas miembros d'o CONSELLO D'A FABLA ARAGONESA presens u representatas. As botazions se ferán á man debantada, fueras d'os casos en que bel consellero o bella consellera demande botazión secreta.

Artículo 12eno. L'Asamblea Cheneral extraordinaria podrá estar clamata á demanda d'a Chunta Direutiba u de, á o menos, 1/3 (un terzero) d'os consellers e d'as conselleras de Pleno Dreito.

Artículo 13eno. Son competencias de l'Asamblea Cheneral extraordinaria:

1ero. Modificar as Ordinazions;

2ndo. Nombramiento d'a Chunta Direutiba;

3ero. Desposición e allenazión de biens;

4eno. Nombramiento d'almenistradors e ripresentans de l'asoziazión;

5eno. Fer a demanda de declarazión d'utilidá publica;

6eno. Pillar alcuerdos ta formar bella federazión u integrar á o CONSELLO D'A FABLA ARAGONESA en beluna preesistén;

7eno. Forachitar de l'asoziazión á consellers e conselleras;

8eno. Delegazión de competencias en e á la Chunta Direutiba;

9eno. Aprebar os Reglamentos e desposizions chenerals feitas por a Chunta Direutiba;

10eno. Aprebar u refusar a dentrada de nuevos miembros de Pleno Dreito;

11eno. As atras atribuzions que li sigan atorgatas por istas Ordinazions e o Reglamento de rechimen interno

Artículo 14eno. O clamamiento e funcionamiento de l'Asamblea Cheneral extraordinaria será igual como a ordinaria, seguntes os artículos 11eno. e 12eno. d'istas Ordinazions, difueras de os trestallos 1ero. e 9eno. esprisatos en l'artículo de debán. En o caso de botazión ta forachitar á una presona miembro d'o CONSELLO D'A FABLA ARAGONESA, caldrá que no i siga presén en l'auto d'emisión de boto a presona á qui se'n tramite o forachitamiento.

En tot caso as botazions de os asuntos á que fan referencia os trestallos 2ndo., 3ero., 7eno. e 10eno. de l'artículo de debán tendrán que estar secretas.

Artículo 15eno. A Chunta Direutiba ye formata por 8 (güeito) miembros de Pleno Dreito de l'asoziazión con os siguiens cargos: un Presidén, un Bize-presidén, un Secetaire Cheneral, un Tesorero e cuatro Bocals con funzions de secretaires espezificos d'as dembas que se'n concreten en l'Asamblea Cheneral extraordinaria en a que sigan eslexitos. Tamién podrá esistir, en a Chunta Direutiba, una presona trigata como Bocal de e entre os consellers e as conselleras d'Aduya.

O mandato d'a Chunta Direutiba será de dos añadas.

Artículo 16eno. En caso d'ausenzia, malotia, renunzia u delegazión espresa, o Presidén será sustituyito por o Bize-presidén; en caso d'ausenzia, malotia u renunzia simultania d'o Presidén e d'o

Bize-presidén, o resto d'a Chunta Direutiba trigará, d'entre os suyos miembros, á o consellero u á ra consellera de Pleno Dreito que ferá as suyas funzions. En caso d'ausenzia, malotia u renunzia d'o Secretaire Cheneral e /u d'o Trosorero, o Presidén u qui faiga las suyas funzions, nombrará á ra presona d'a Chunta Direutiba que, en cada caso, ocupe probisionalmén ditos puestos.

Articlo 17eno. En caso de dimisión de todas as presonas que forman a Chunta Direutiba, se'n ferá cargo d'a Presidencia o consellero u a consellera de Pleno Dreito de más gran edá, qui trigará una chunta chestora probisional, de no menos de cuatro miembros, e ferá clamamiento urchén d'una Asambleya Cheneral extraordinaria ta trigar una nueba Chunta Direutiba.

Articlo 18eno. A Chunta Direutiba ye l'organo que executa os alcuerdos prenitos por l'Asambleya Cheneral, adota as dezisions que li son delegatas, reculle e tramita o correyo e coordina as autibidaz de l'asoziazión.

Articlo 19eno. A Chunta Direutiba ha de superbisar as autuazions de as presonasasoziatas, cuan autúen como tals, e de os roldes locals u comarcals que se'n constituigan, asinas como señalar autibidaz u treballos que cal que en sigan feitos.

Articlo 20eno. O Presidén u a Presidenta, u a presona en qui delegue ta cada caso, tiene as siguiens funzions:

- 1ero. Cumplir e fer cumplir as resoluzions de os organos de gobierno d'o CONSELLO D'A FABLA ARAGONESA;
- 2ndo. Presidir tanto l'Asambleya Cheneral como a Chunta Direutiba;
- 3ero. Ostentar a ripresentazión publica d'o CONSELLO D'A FABLA ARAGONESA;
- 4eno. Clamar, suspender, debantar as sesiones e desempazar as botazions con o suyo boto de calidá en a Chunta Direutiba;
- 5eno. Fer o suyo señal en os documentos que calga señalar;
- 6eno. As atras funzions que l'atorguen u faculten os organos de gobierno d'o CONSELLO D'A FABLA ARAGONESA e as presens Ordinazions.

Articlo 21ero. Corresponden á la presona que ocupe o puesto de Secretaire Cheneral d'o CONSELLO D'A FABLA ARAGONESA as funzions siguiens:

- 1ero. Estar o fedatario de os alcuerdos d'as asambleyas chenerals e d'as chuntas direutibas, trascribindo-los en o Libro d'Autas d'o CONSELLO D'A FABLA ARAGONESA;
- 2ndo. Fer as funzions burocraticas que li mande a Chunta Direutiba;
- 3ero. Fer o clamamiento ta achuntar as asambleyas chenerals, á demanda d'a Chunta Direutiba, e as chuntas direutibas, á demanda d'o Presidén u d'a presona en qui delegue;
- 4eno. Albertir de parola u por escrito si os Reglamentos e alcuerdos presos por os organos de gobierno son conformes con as presens Ordinazions;
- 5eno. Alzar e costodiar o libro-rechistro u os meyos eleutronicos u informaticos en os cualos se troben os datos presonals e bancarios d'os consellers e d'as conselleras, sigan d'a clase que sigan, asinas como d'as presonas conduzitas á ras publicazions d'o CONSELLO D'A FABLA ARAGONESA;
- 6eno. Chestionar a correspondenzia d'o CONSELLO D'A FABLA ARAGONESA, asinas como guarenziar o debito rechistro e archibo d'a mesma;
- 7eno. Beilar por a costodia d'os libros d'autas e d'os libros que li deposite o Trosorero, rechistros de dentrada e salida, documentos, correspondenzia, contratos, siellos e claus d'o CONSELLO D'A FABLA ARAGONESA;
- 8eno. Fer zertificazions, que podrán lebar o conforme d'o Presidén;
- 9eno. Notificar os alcuerdos d'as asambleyas chenerals e d'as chuntas direutibas;
- 10eno. Chestionar os asuntos propios d'o CONSELLO D'A FABLA ARAGONESA que li sigan mandatos por a Chunta Direutiba u o Presidén.

Articlo 22ndo. A presona que siga á o fren d'a Trosorería d'o CONSELLO D'A FABLA ARAGONESA tendrá as funzions siguiens;

1ero. Lebar a contabilidad e l'almenistrazión de l'asoziazión e de toz os tramites que se'n deriben, fendo-se-ne cargo de facturas e albarans, libro de contabilidad, libro Mayor, libros de bancos e d'a Caja d'a entidá e cuantas dilixenzias calga fer ta o correuto desembolique d'o suyo treballo, en o cuallo podrá estar aduyato por o Secretaire Cheneral;

2ndo. Emitir, de parabra u por escrito, informe prebio sobre os asuntos de caráuter economico que se baigan á tratar en as asambleyas chenerals u en as chuntas direutibas.

Articulo 23ero. As presonas que ocupen a Bize-presidencia e as Bocalías d'a Chunta Direutiba s'ocuparán d'as responsabilidaz deribatas d'a suya eslezió e as que sigan acordatas en a Chunta Direutiba.

Articulo 24eno. A Chunta Direutiba s'achuntará con caráuter ordinario, como poco, una begata cada dos meses, ta superbisar a marcha de l'asoziazión, a situazió de as cuentas e as custions ordinarias de tramite, asinas como dezidir en qué lugar e puesto s'achuntan as asambleyas chenerals e fixazió d'o correspondién orden d'o día. Caldrá l'asistenzia d'o Presidén u, en o suyo caso, d'o Bize-presidén u presona delegada por ixé, d'o Secretaire Cheneral, d'o Tesorero –de cuala assistenzia se'n ferá eszeuzió por sincusa espresa– e de, por o menos, un Bocal.

Os alcuertos se pillarán por consenso, á no estar que calga fer botazió, á cuallo efeuto estarán presos por mayoría ausoluta en primera botazió y, de no aber-bi'n, mayoría simpla en segunda.

Articulo 25eno. A Chunta Direutiba s'achuntará con caráuter extraordinario cuan lo demande o Presidén u cualsiquiera d'os miembros d'a Chunta. O Presidén biene obligato á clamar Chunta Direutiba d'urchenzia ta confezionar l'orden d'o día de l'Asambleya, cuan lo demande 1/3 (un terzer) d'os consellers e d'as conselleras de Pleno Dreito.

Articulo 26eno. A Chunta Direutiba exerzerá o control d'as fainas e bosamientos que pertuquen á presonas colaboradoras u achustatas, siga con caráuter contino u ta quefers concretos.

Articulo 27eno. A Chunta Direutiba podrá crear una comisión teunica d'asesoramiento e informazió sobre asuntos propios d'ista asoziazión (reglatos por l'articulo 2ndo. d'istas Ordinazions), cuallo reglamento e competencias se fixarán en asambleya cheneral u, por delegazió d'ísta, en a propia Chunta Direutiba.

CABO III D'AS PRESONAS ASOZIATAS

Articulo 28eno. En o CONSELLO D'A FABLA ARAGONESA bi ha tres menas de presonas asoziatas:

1ero. Consellers e conselleras de Pleno Dreito: presonas cualificatas por os suyos conoximientos de l'aragonés e destacatas por as suyas rechiras, autibidaz e publicazions en aragonés, sobre l'aragonés u en esfensa de l'aragonés. Iestas presonas son almitidas por a Chunta Direutiba e ratificatas por l'Asambleya Cheneral. O suyo lumero estará ilimitau;

2ndo. Consellers e conselleras d'Onor: presonas proposatas ta ista condizió por a Chunta Direutiba, parando cuenta en una faina meritoria en esfensa de l'aragonés. L'Asambleya Cheneral emologará ista distinzión. O suyo lumero podrá estar limitato;

3ero. Consellers e conselleras d'Aduya: presonas que no tiengan atro intrés presonal que o de refirmar á ista asoziazión, sin alegar denguno d'os meritos ementatos en o trestallo 1ero. d'iste articlo, u ixas presonas que no tiengan capacidá d'obrar por razón d'a minoría d'edá. O suyo lumero será ilimitato. Ta estar consellero/a d'Aduya será prou con manifestar-lo boluntariamén por escrito.

Articulo 29eno. Os consellers e as conselleras de Pleno Dreito tienen os dreitos siguiens:

1ero. Recullir o clamamiento e acudir ta ras asambleyas chenerals, partizipando-bi con boz e con boto;

2ndo. Poder estar ripresentatos/as en as asambleyas chenerals por atro consellero/a de Pleno Dreito, delegando-li a suya boz e o suyo boto e atorgando-li amplo poder ta dezidir, en o caso de que no puedan asistir-bi;

3ero. Trigar os miembros d'a Chunta Direutiba e poder estar trigatos/as ta ísta;

4eno. Partizipar en as autibidaz e quefers d'o CONSELLO D'A FABLA ARAGONESA;

5eno. Recullir, sin de conduta espezial, as zerculars informatibas que l'asoziazión emita ta ras presonas asoziatas e as publicazions que sigan d'entera responsabilidad d'ista asoziazión;

6eno. Conoxer con antelazión as autibidaz publicas que organize ista asoziazión;

7eno. Emplegar os fondos bibliograficos e os materials e equipamientos de l'asoziazión ta fainas que no contradigan os ochetibos señalatos en istas Ordinazions;

8eno. Demandar de conchunta, en lumero igual u superior á 1/3 (un terzero) d'os consellers e d'as conselleras de Pleno Dreito que se clame á Asamblea Cheneral extraordinaria.

Articlo 30eno. Os consellers e as conselleras d'Aduya tienen os siguiens dreitos:

1ero. Recullir o clamamiento e acudir ta ras asambleyas chenerals, partizipando-bi con boz pero sin de boto. En os casos en que os asuntos á tratar tiengan que beyer direutamén con o suyo coleutibo, tamién en tendrán de boto;

2ndo. Poder estar ripresentatos/as en as asambleyas chenerals por atro/a consellero/a d'Aduya, delegando-li a suya boz e o suyo boto e atorgando-li amplo poder ta dezidir, en o caso de que no puedan asistir-bi;

3ero. Partizipar en as autibidaz e quefers d'o CONSELLO D'A FABLA ARAGONESA, si en ye d'o suyo implaz;

4eno. Recullir, sin de conduta espezial, as zerculars informatibas que l'asoziazión emita ta ras presonas asoziatas e as publicazions que sigan d'entera responsabilidad d'ista asoziazión;

5eno. Conoxer con antelazión as autibidaz publicas que organize ista asoziazión;

6eno. Partizipar en o Rolde de consellers e conselleras d'Aduya, a organizazión de o cual será autonoma, podendo trigar, d'entre e por os suyos componens, una presona que los ripresentará debán d'a Chunta Direutiba, con boz pero sin de boto.

Articlo 31ero. Os consellers e as conselleras de Pleno Dreito tienen as obligazions siguiens:

1ero. Acudir t'as asambleyas chenerals d'o CONSELLO D'A FABLA ARAGONESA;

2ndo. Bosar as condutas cuan sigan emitius os rezibos;

3ero. Refirmar e esfender siempre á ista asoziazión, sin que por ixo pueda deduzir-se zensura t'a critica interna, asinas como as fins señalatas en l'articlo 2ndo. d'istas Ordinazions;

4eno. Informar puntualmén d'as suyas prebistas autibidaz publicas rilazonatas con l'aragonés e d'os treballos e rechiras que, siga á tetulo presonal u coleutibo, reyalizen en rilazión con l'aragonés e que en tiengan intinzió de publicar;

5eno. Contribuyir á os quefers que se deriben d'os alcuerdos d'as asambleyas e d'as chuntas direutibas.

Articlo 32ndo. Os consellers e as conselleras d'Aduya tienen as siguiens obligazions:

1ero. Acudir ta ras asambleyas chenerals d'o CONSELLO D'A FABLA ARAGONESA;

2ndo. Bosar as condutas cuan sigan emititos os rezibos;

3ero. Refirmar e esfender siempre á ista asoziazión, sin que por ixo pueda deduzir-se zensura ta ra critica interna, asinas como as fins señalatas en l'articlo 2ndo. d'istas Ordinazions.

Articlo 33ero. O incumplimiento d'istas Ordinazions será peñorable por a Chunta Direutiba, seguntes a grabedá, con:

1ero. Amonestazión de parola á ra presona intresata;

2ndo. Amonestazión por escrito que será comunicata á l'Asamblea Cheneral;

3ero. Deseparazión de l'asoziazión, ratificata por l'Asamblea Cheneral. En cualsquier caso, toda presona asoziativa que siga acusada d'incumplimiento d'istas Ordinazions, abrá d'estar ascuitata por os organos competens e podrá exerzer o suyo dreito d'esfensa.

O prozedimiento de forachitar por incumplimiento grau d'istas Ordinazions se ferá, en cualsquier caso, en Asamblea Cheneral extraordinaria en cualo orden d'o día se bi'n abrá cuaternau. Pillata ra dezisión de forachitamiento, por mayoría de 2/3 (dos terzers) d'as presonas asoziatas assistens u ripresentatas, o consellero u a consellera forachitau u forachitada podrá

recurrir l'aluerdo de l'Asamblea Cheneral extraordinaria debán de dito organo de gobierno en o plazo d'un mes, contadero dende o día en que se li notifique dita resolución, alportando por escrito os argumentos e as prebas d'esculpación que creiga menister, e que a benién Asamblea Cheneral reconsiderará. En a resolución de forachitamiento, deberá señalar-se o plazo de tiempo en o que a presona inculpada no podrá tornar á demandar a dentrada en l'asoziazión, o cuallo se ferá prebio aluerdo de l'Asamblea Cheneral extraordinaria.

Articlo 34eno. Tot consellero u toda consellera dixerá d'estar-ne con a suya simpla manifestazión motibata feita por meyo d'un escrito siñato enfilato á ra Chunta Direutiba, d'o que s'informará á l'Asamblea Cheneral.

Articlo 35eno. Sin de prebia autorizazión espresa d'a Chunta Direutiba denguna presona asozziata podrá comprometer publicamén o nombre d'o CONSELLO D'A FABLA ARAGONESA.

CABO IV D'AS ESTRUTURAS DEPENDIENS

Articlo 36eno. Podrán estar estruturas dependiens d'o CONSELLO D'A FABLA ARAGONESA:

1ero. O Rolde de consellers e conselleras d'Aduya;

2ndo. Roldes locals u comarcals;

3ero. Cualsiquier mena d'asoziazión, colla u organizazión que azeute una dependencia organica d'o CONSELLO D'A FABLA ARAGONESA.

Articlo 37eno. O Rolde de consellers e conselleras d'Aduya podrá partizipar en a vida interna d'o CONSELLO D'A FABLA ARAGONESA d'aluerdo con o esprisau en os articlos 4eno., 28eno., trestallo 3, 30eno. e 32ndo. d'istas Ordinazions.

Articlo 38eno. Son Roldes locals u comarcals d'o CONSELLO D'A FABLA ARAGONESA toz os que:

1ero. Tiengan un ambito local u de redolada;

2ndo. Tiengan unas fins, ordinazions e autibidaz coderens con as d'o CONSELLO D'A FABLA ARAGONESA e conoxitas por íste;

3ero. Faziliten una rilazión de presonas asoziatas;

4eno. Manifiesten o suyo deseyo de pender organicamén d'o CONSELLO D'A FABLA ARAGONESA e ista manifestazión siga emologata por l'Asamblea Cheneral.

Articlo 39eno. As rilazions con o CONSELLO D'A FABLA ARAGONESA d'as presonas miembros d'istos Roldes locals u comarcals que no sigan consellers e conselleras de Pleno Dreito u d'Aduya se reglarán por as normas que estatuezca o suyo propio Rolde.

Articlo 40eno. Cada Rolde podrá señalar un representán debán d'o CONSELLO D'A FABLA ARAGONESA con posibilidá de partizipar en as asambleyas con boz pero sin de boto.

Articlo 41ero. O CONSELLO D'A FABLA ARAGONESA ferá plegar á os Roldes informazión sobre as suyas autibidaz e publicazions.

CABO V D'A ORGANIZAZIÓN D'O CONSELLO D'A FABLA ARAGONESA

Articlo 42^{no}. Ta o cumplimiento d'as suyas finalidaz e d'os suyos ochetibos, o CONSELLO D'A FABLA ARAGONESA podrá, en cada caso e zercustanzias, contar con a siguién organización funcional:

- 1^{ero}. Dembas de Treballo;
- 2^{no}. Comisions informatibas d'a Chunta Direutiba;
- 3^{ero}. Serbizios de Biblioteca, Emeroteca, Entrecamdeo e Espardidura;
- 4^{eno}. Serbizio de Publicazions;
- 5^{eno}. Presonas becatas u achustatas;
- 6^{eno}. Cualsiquier atra que creiga menister.

Articlo 43^{ero}. Ta o millor desembolique d'a faina de l'asoziazión, ísta se podrá organizar en Dembas de Treballo.

O lumero de Dembas de Treballo que podrán existir en o CONSELLO D'A FABLA ARAGONESA e as suyas competencias será fixato por a Chunta Direutiba en un Reglamento, que deberá estar emologato por l'Asambleya Cheneral.

Articlo 44^{eno}. Á o fren de cada Demba de Treballo bi abrá una presona asoziata, en calidá d'Enfilador u Enfiladora, responsable d'as autibidaz d'a mesma, que será eslexita por a Chunta Direutiba ta ocupar iste puesto por o espazio de tiempo que ísta alcuerde.

Articlo 45^{eno}. Sin prechudizio d'a existencia d'as Dembas de Treballo, en o sino d'o CONSELLO D'A FABLA ARAGONESA podrán existir diferens Comisions informatibas d'a Chunta Direutiba, que s'ocuparán d'informar d'os temas que lis sigan encomendatos, ta dimpués estar risueltos por iste organo de gobierno.

As Comisions informatibas siempre serán presiditas por presonas que formen parti d'a Chunta Direutiba, estando incompatible con a presidencia d'una Demba de Treballo.

O Secretaire Cheneral de l'asoziazión, por razón d'o suyo puesto, no podrá presidir denguna Comisión informatiba.

Articlo 46^{eno}. Ta un millor funcionamiento d'o CONSELLO D'A FABLA ARAGONESA, entre os muitos posibles, podrá tener os siguiens serbizios:

- 1^{ero}. Serbizio de Biblioteca, que tendrá como misión organizar, empentar e meter os suyos fondos bibliograficos á o serbizio de cuantos s'intresen por ers;
 - 2^{no}. Serbizio d'Emeroteca, que tendrá como misión a d'ordenar, catalogar, enamplar e espartir os fondos propios de l'asoziazión;
 - 3^{ero}. Serbizios d'Entrecamdeo e Espardidura, que s'encargará d'aumentar e espartir o fundo editorial d'o CONSELLO D'A FABLA ARAGONESA á trabiés d'una adecuada pulitica d'entrecamdeo con atras instituzions, entidaz e razons comerzials singulares;
- Istos serbizios penderán d'una Bocalía d'a Chunta Direutiba.

Articlo 47^{eno}. O CONSELLO D'A FABLA ARAGONESA podrá disponer d'un Serbizio de Publicazions ta o millor desembolique d'as suyas fins ta espartir, promoziar e empentar l'aragonés en os terminos esprisatos en l'artículo 2^{no}. d'istas Ordinazions. Iste serbizio penderá d'una Bocalía d'a Chunta Direutiba.

CABO VI D'O PATRIMONIO, A FINANZIAZIÓN e L'ALMENISTRAZIÓN

Articlo 48^{eno}. L'Asambleya Cheneral d'o CONSELLO D'A FABLA ARAGONESA fixará as condutas que tiene que bosar cada modalidá de consellers e conselleras, á propuesta d'a Chunta Direutiba.

Cuan se tienga que tratar a puyada d'o importe d'as condutas, ísta deberá cuaternar-se en l'orden d'o día tanto d'a Chunta Direutiba como de l'Asambleya Cheneral.

Articlo 49eno. O patrimonio fundazional d'o CONSELLO D'A FABLA ARAGONESA lo constituyen 5000 (zinco mil) pezetas.

Articlo 50eno. As posibles redamas estraordinarias acordadas por l'Asamblea Cheneral, abendo-sen señalato en l'orden d'o día correspondièn, se ferán á cargo de toz os consellers e todas as conselleras de Pleno Dreito e d'Aduya por igual, tanto presens como ausens.

Articlo 51ero. Os recursos economicos s'alazetarán más que más en as alportazions d'os consellers e d'as conselleras, por meyo d'as condutas obligatorias e donazions boluntarias. O CONSELLO D'A FABLA ARAGONESA podrá recurrir á otros meyo legals subsidiarios ta replegar recursos economicos. O presupuesto añal lo presentará a Chunta Direutiba á l'Asamblea Cheneral ordinaria ta ra suya aprebazión e en dengún caso sobrexerá a cantidá legalmén establita.

Articlo 52ndo. En caso d'esfer-se l'asoziazión, o posible capital que en tienga se destinará á obras de caráuter cultural rilazionatas con l'aragonés, por dezisión d'una Asamblea Cheneral estraordinaria liquidadera.

CABO VII

D'A MODIFICAZIÓN D'ISTAS ORDINAZIONS e A DISOLUZIÓN DE L'ASOZIAZIÓN

Articlo 53ero. A modificazión d'istas Ordinazions podrá acordar-se por mayoría de, por o menos, 2/3 (dos terzers) d'os botos favorables d'as presonas miembros de Pleno Dreito presens e representatas achuntatas en Asamblea Cheneral estraordinaria, cualo orden d'o día fixe con claredá ista fin.

Articlo 54eno. A disoluzión d'o CONSELLO D'A FABLA ARAGONESA s'alcordará en Asamblea Cheneral Estraordinaria por unanimidá. O clamamiento d'a cuala se ferá con iste unico asunto en l'orden d'o día; una begata presa ra dezisión, l'Asamblea Cheneral prozederá á liquidar o capital u nombrar una Chunta Liquidadera que lo ferá d'aluerdo con o esprisato en l'articlo 52ndo. d'as presens Ordinazions.

DESPOSIZIONS FINALS

Articlo 55eno. Ta tot o que no siga cuaternato en istas Ordinazions se'n estará á o disposato por cualsquier lexislazió que siga d'aplicazión.

Articlo 56eno. As presens Ordinazions son estatas aprebatas definitibamén por l'Asamblea Cheneral estraordinaria d'o CONSELLO D'A FABLA ARAGONESA, en sesión zelebrata o 12 d'abiento de 1998, quedando zircundutas as que dica agora yeran baleras.

CONFORME, O PRESIDÉN,

Francho Ch. NAGORE LAÍN

O SECRETAIRE CHENERAL,

Chesús Á. GIMÉNEZ ARBUÉS

